

3 JUAN

É Kálara Léa Apostol Juan a ngá tsili

Mbóló

¹Ma ntébosú:

Ma tsili ndzindziŋ Gayo é kálara ní, éní ma dziŋ ya bébélá edziŋ.

Olugú ya Gayo

²Á ndzindziŋ, ma kómo ná mam mése mé ke wa mvéáñ, o tɔbo fe mvwaá, amvála ané nlém we, wá wá ke mvéáñ. ³Amú ná má bíra sán éyɔŋ bɔbédzan benziŋ bé ngá sɔ, bée vé ngañiá ébe é bébélá we, amvála ané wa wulu á bébélá été. ⁴Mésán má dan belé mé né, fáve ná ma wók ná é bɔŋ bam bá wulu á bébélá été.

⁵Á ndzindziŋ, wa bɔ édí é ne nzósoó, éyɔŋ wa belan ya bɔbédzan, ádan dan beyén, ⁶ébɔ fá bá vé ngañiá ye édziŋ dwe á mfá ékóánn bebwíni áse. Wa ye bɔ mvéáñ ná o vwála bɔ mfá átsíni ya ékena deba ámvála dá ñep ya Nzamá; ⁷amú ná bé ngá kólo ákála Éyola [Kristo], bá kaa áñɔŋ dzóm enziŋ ébe é bot bé sés bebwíni. ⁸Éde bía, bía yian ñɔŋ amvála bot te, á mfá ye ná bí bɔ eséññ á mfá bébélá fufúlu bíabe bɔ.

Diótrefes bá Demetrio

⁹Má tsili ékóánn bebwíni dzaŋ enziŋ, ve Diótrefes, é mot aa dziŋ aa bɔ ntébosú énzénzan deba, áá ñú bía tán. ¹⁰Ya akála dzaŋ te, ngé me sɔ, máá ye vwían míbɔann myén aa bɔ, eé sómán bía ékúkwat été ya mbéa bifíá, éní kaa átɔbo mvwaá ya édí te, áá ñɔŋ bɔbédzan, é bot bá bá kómo bɔ áñɔŋ aa kili bɔ dɔ, aa tsílán fe ya bɔ ékóánn bebwíni été.

¹¹Á ndzindziŋ, o táa vú abé, fáve mvéáñ. Éní aa bɔ mvéáñ a ne é mot Nzamá; éní ní aa bɔ abé, áá bé yén Nzamá.

¹²Bot bése bá vé yaá Demetrio ngañiá ya fe bébélá émyen. Éde, bía bía vé fe ngañiá, wa yem fe ná é ngañiá wea a ne bébélá.

Meyáán

¹³Mé mbé mé belé abwiññ mam méye átsili wa, ve mǎá kómo wa tsili ya afép ya nsɔŋ; ¹⁴ve déá, ma tɔɔ ya mebúnn ná avítsaŋ tám ma ye wa yén, véa bía ye kóbo asú ya asú.

¹⁵Mvwaá ya wa. Bemvwiññ bea bá sómo wa. Wa sómoné fe bemvwiññ bea, kada mot ya éyola.